

Hnub no Sacramento City Unified Tus Thawj Tswj Jorge Aguilar thiab Pawg Thawj Tsam Xwm Sac City Unified School Board tau tshaj tawm tias txhua lub tsev kawm ntawv hauv koog tsev kawm ntawv Sacramento City Unified School District yuav raug kaw ob peb hnub uas pib hnub Monday, lub 3 hlis ntuj tim 16 mus txog hnub Wednesday, lub 3 hlis ntuj tim 18, mam li rov pib tuaj kawm ntawv dua rau hnub Thursday, lub 3 hlis ntuj tim 19. Thaum kaw tsev kawm ntawv lawm, lub Hauv Paus Tsev Kawm Ntawv yuav ua haujlwm txuas ntxiv los npaj kev qhia ntawv rau peb cov tub/ntxhais kawm ntawv thiab txhawb peb lub zej zog thaum muaj tus kab mob COVID-19 uas yog teebmeem txog pej xeev kev noj qab haus huv.

Cov tsev kawm ntawv yuav qhib rau txhua tus tub/ntxhais kawm ntawv thiab cov neeg ua haujlwm tag kis, hnub Friday, lub 3 hlis ntuj tim 13. Yog yim neeg twg xav cia cov tub/ntxhais kawm ntawv nyob tsev tag kis, nws yuav yog ib qho kev qhaj ntawv uas zam tau rau. Raws li tau hais yav tas los, yog tias ib tug tub/ntxhais kawm ntawv lossis neeg ua haujlwm muaj mob uas ua rau lawv yuav muaj kev phom sij ntau dua rau tus kab mob COVID-19, ces lawv yuav tsum nyob hauv tsev.

Cov tsev kawm ntawv yuav raug kaw txij hnub Wednesday, lub 3 hlis ntuj tim 18, 2020 kom siv tshuaj los tu huv si rau txhua chav kawm thiab ua raws li cov kev cai tshiab uas yuav tau ua raws li Cov Thawj Coj tau tsim los ntawm Governor Gavin Newsom nyob rau ntawm 24 xuaj moos dhau los, thiab cov lus qhia tuaj ntawm California Department of Public Health, thiab lub chaw tiv thaiv kab mob Centers for Disease Control. Peb yuav qhia cov kev hloov tshiab rau lub asthiv tom ntej ntawm hnub Tuesday, lub 3 hlis ntuj tim 17 hais txog ntawm kev ncuaj sijhawm kaw tsev kawm ntawv.

Qhov kev kaw tsev kawm ntawv rau ob peb hnub yuav cia Hauv Paus Tsev Kawm Ntawv ua tau cov li hauv qab no:

- Ntxua kom huv thiab yuav tej khoom tus vaj tse
- Siv tshuaj tu txhua lub tsev kawm ntawv kom huv si
- Ua kom txhua chav kawm muaj cov khoom siv uas tseem ceeb
- Ua kom muaj cov khoom siv los ntxuav tes txaus txuas ntxiv
- Tsim cov kev cai hais txog tsev kawm ntawv tej kev ua ub ua no, field trips, thiab lwm yam kev lom zem
- Sib tham nrog cov neeg ua haujlwm koomtes los txhawm rau kom cov neeg ua haujlwm nyob nyab xeeb
- Muab kev cob qhia txog kev tiv thaiv thiab kev txo kom tsawg (xws li ntxuav tes, cov kev cai ua raws yog thaum muaj mob)

Nag hmo [Governor Gavin Newsom tau tshaj tawm tias California cov neeg saibxyuas pej xeev kev noj qab haus huv tau tshaj tawm txoj cai tswj fwm tshiab rau kev sib sau uake los tiv thaiv pej zeem kev noj qab haus huv thiab kom txo tau kev sib kis ntawm tus kab mob COVID-19.](#) Nws kuj tau hais ntxiv tias cov

hauv paus tsev kawm ntawv ua raws [cov lus qhia muab los ntawm California Department of Public Health](#) hais txog cov tsev kawm ntawv uas tsim nyog raug kaw yog tias muaj ib tug tub/ntxhais kawm ntawv, ib tug xibfwb, lossis neeg ua haujlwm tau raug kuaj tias muaj tus kab mob COVID-19.

“Peb koog tsev kawm ntawv thiab lub zej zog tau ntsib ib qho teeb meem kev noj qab haus huv uas tsis tau pom dua. Ntawm peb cov lus teb rau tus kab mob COVID-19, peb yuav tsum ua raws li kev txawj ntse ntawm peb cov kws paub txog kev noj qab haus huv thiab peb cov neeg uas raug xaiv tsa los ua haujlwm, thiab peb suav peb lub zej zog los daws qhov teeb meem no uake los ntawm siv cov kev tiv thaiv,” hais los ntawm Superintendent Aguilar.

“Raws li Governor Newsom tau hais hnuv no nyob rau ntawm lub rooj sib tham nrog nws sawv ntxov no, peb cov tsev kawm ntawv tseem ceeb rau peb lub zej zog. Tsis yog peb txiav txim siab kaw cov tsev kawm ntawv, thiab peb paub txog tias muaj kev txhawj xeeb thiab teeb meem uas qhov kev txiav txim siab no yuav ua rau tsev neeg,” Superintendent Aguilar hais txuas ntxiv. “Hauv Paus Tsev Kawm Ntawv tau ceeb toom rau peb cov thawj coj uas raug xaiv tsa thiab tau hu rau txhua tsev neeg kom lawv paub txog qhov kev txhim kho no, thiab qhia txog tej uas yuav mus muab zaub mov noj rau lub chaw twg thiab lwm yam kev pabcuam uas tseem ceeb uas Hauv Paus Tsev Kawm Ntawv yuav muab pab txuas ntxiv rau lub sijhawm kaw tsev kawm ntawv ib ntu no.”

“Nyob rau thaum uas tsis muaj ib qho kev daws tau qhov teebmeem kev noj qab haus huv no kom zoo li, lub homphiaj ces yog los ua kom kev sib kis tus kab mob no txhob sib kis ceev dhau. Lub Hauv Paus Tsev Kawm Ntawv yuav ua tes dejnum txuas ntxiv raws li cov kev qhia los ntawm lub chaw Disease Control thiab California Department of Public Health thiab kaw cov tsev kawm ntawv thoob plaws hauv koog tsev kawm ntawv yog tias yuav kom siv tau tej tshuaj los mus tu los mus ntxuav cov chav kawm thiab npaj cov cai tshiab uas kom ua raws sib nrug mas thiaj li yuav pab txo kom tej kev ua kub ua ntaiv heev no txhob ntau dhau,” hais los ntawm Dr. Peter Beilenson uas yog tu Thawj Tswj ntawm Sacramento County Department of Health Services.

Sac City Unified yuav ua tes dejnum txuas ntxiv los muab zaub muab mov rau cov tub/ntxhais kawm ntawv uas raug cov xwm txheej no los ntawm tsev kawm ntawv lub nutrition programs nyob rau lwm lub asthiv thoob plaws ntawm koog tsev kawm ntawv uas cov tsev kawm ntawv raug kaw. Yuav kom paub tias kev noj zaub mov zoo ntawm peb cov tub/ntxhais kawm ntawv nyob rau lub sijhawm nyob nram tsev lossis nyob rau lwm yam kev saibxyuas, Peb lub Hauv Paus Tsev Kawm Ntawv yuav faib tshais thiab su txhua txhua hnuv tsis hais tus menyuam twg li tsuav hnuv nyoog yog 18 xyoo lossis nqis dua ntawv nqa tau mus tsev ntawm [cov chaw thoob plaws koog tsev kawm ntawv](#) nyob rau lub sijhawm uas tsev kawm ntawv kaw.

“Peb yuav tsis kaw tas nrho cov tsev kawm ntawv tom ntej no lawm dua li yog tsis yog cov kws tshaj lij paub txog pej xeem kev noj qab haus huv hais tias yog ua li ntawd yuav pab tiv thaiv tau pej xeem kev noj qab haus huv thiab kev noj qab nyob zoo ntawm cov tub/ntxhais kawm ntawv thiab cov neeg feem coob hauv lub zej zog tshaj li uas cia peb cov tsev kawm ntawv qhib thiab cia cov tub/ntxhais kawm ntawv muaj kev noj qab haus huv hauv tsev kawm ntawv,” hais los ntawm tus thawj tswj Superintendent Aguilar. “Qhov no yog ib qho teebmeem uas tshwm sim sai heev, thiab raws li uas peb kawm paub cov case tshiab thiab tau txais cov kev qhia tshiab tuaj ntawm cov saibxyuas kev noj qab haus huv tuaj, peb yuav ua tes dejnum txuas ntxiv los qhia tej yam uas muaj tshiab rau peb cov tsev kawm ntawv hauv lub zej zog. Tag nrho cov kev txiav txim siab uas cuam tshuam txog cov xwm txheej kev noj qab haus huv no yuav muab ceev txuas ntxiv mus ua kev sib tham tuav tswv yim nrog rau Sacramento County Public Health (SCPH) raws li peb ntsuam xyuas tias seb qhov twg zoo dua mas peb cov tub/ntxhais kawm ntawv thiab cov tsev kawm ntawv hauv lub zej zog thiaj noj qab haus huv thiab nyab xeeb.”

Txhua tus tub/ntxhais kawm ntawv, cov neeg ua dejnum, thiab cov neeg hauv lub zej zog yuav tau ua raws li Hauv Paus Tsev Kawm Ntawv cov cai kev noj qab haus huv uas raws li kev qhia los ntawm [SCPH](#) los tiv thaiv cov uas lub cev tsis muaj zog txaus uas ntsib kev phom sij yooj yim dua nyob rau hauv peb cov zej zog:

- Txhua tus tub/ntxhais kawm ntawv, cov neeg ua dejnum, thiab cov neeg hauv tsev neeg yuav tsum nyob twj ywm hauv tsev yog tias tsis xis neej. Yog tias ib tug neeg muaj cov tsos mob li kub taub hau, hnoos, ua tsis tshuam taus pa, ces lawv yuav tsum nyob twj ywm hauv tsev txhob mus haujlwm lossis kawm ntawv kom txog rau thaum tsis muaj cov tsos mob tau li 72 xuaj moos lossis tom qab 7 hnuv suav txij thaum pib muaj cov tsos mob los, seb qhov twg ntev dua.
- Cov neeg uas yuav muaj kev phom sij ntau tshaj vim muaj hnuv nyoog lawm lossis muaj cov mob xws li mob kab mob plawv, mob khees xaws, mob plawv, lossis mob ntsws xws li COPD, thiab cov neeg uas lub nrog cev tsis muaj zog txaus los tiv thaiv kab mob yuav tsum nyob hauv tsev thiab nyob nrug deb ntawm tej chaw uas muaj neeg coob coob uake sib ze pes daws.

Sac City Unified muaj ib lub web page tshiab uas yog tsim los teb cov lus nug uas nug heev tshaj txog ntawm tus kab mob COVID-19 ntawm www.scusd.edu/covid-19, uas peb yuav qhia txog tej yam tshiab ua ntu zus nrog rau tej kev paub uas peb tau txais los ntawm Sacramento County Public Health thiab lub chaw tiv thaiv kab mob (Centers for Disease Control and Prevention).

Kev noj qab haus huv thiab kev nyab xeeb ntawm txhua tus ntawm Sac City Unified cov tub/ntxhais kawm ntawv thiab neeg ua haujlwm yog peb thawj qhov kev txhawj xeeb, thiab peb ua tsaug rau txhua tus uas to taub thiab ua lawv feem xyuam kom peb cov tub/ntxhais kawm ntawv thiab tsev kawm ntawv hauv lub zej zog noj qab haus huv.